

**Najib arah siasatan terperinci
Utusan Online
04 Mac, 2013
Oleh ZAINU'L AZHAR ASH'ARI**

ARAU 3 Mac - Datuk Seri Najib Tun Razak mengarahkan pihak berkuasa termasuk bahagian perisikan menjalankan siasatan terperinci bagi mengenal pasti sama ada pencerobohan kumpulan bersenjata di Lahad Datu, Sabah turut melibatkan pemimpin pembangkang negara ini.

Perdana Menteri berkata, ini berikutan terdapat dakwaan mengenai penglibatan pemimpin berkenaan di sebalik kejadian pencerobohan tersebut yang bermula di Kampung Tanduo, Lahad Datu.

"Ini adalah dakwaan serius (penglibatan pemimpin pembangkang) yang memerlukan bukti supaya kita tahu siapa di sebalik kejadian tersebut," kata beliau dalam sidang akhbar selepas merasmikan Kampus Induk Universiti Malaysia Perlis (UniMAP) di Pauh Putra di sini hari ini.

Yang turut hadir, Menteri Pengajian Tinggi, Datuk Seri Mohd. Mohd. Khaled Nordin; Menteri Besar, Datuk Seri Dr. Md. Isa Sabu dan Naib Canselor UniMAP, Prof. Datuk Dr. Kamarudin Hussin.

Menurut Najib, yang menimbulkan persoalan ialah mengapa pencerobohan tersebut baru sekarang dilakukan sedangkan tuntutan ke atas Sabah melibatkan Kesultanan Sulu sudah lama dibuat.

"Ini menimbulkan persoalan, kenapa sekarang, malah Presiden Filipina, Benigno Aquino memberitahu saya dia juga mahu tahu.

"Filipina pun tidak mahu warganegaranya bertindak demikian, terlibat mencerooboh negara lain dengan bersenjata, membunuh dan ganas yang memberi malu besar kepada kerajaan negara tersebut," katanya.

Ditanya apakah Malaysia dan Filipina akan menubuhkan sebuah badan untuk menyiasat dakwaan tersebut, Najib berkata, perkara itu akan dijalankan secara berasingan oleh pihak berkuasa kedua-dua negara.

Mengenai perkembangan terbaharu di Sabah, Najib berkata, setakat ini, pencerobohan tersebut hanya berlaku di tiga kawasan iaitu Lahad Datu, Semporna dan Kunak tanpa melibatkan tempat lain.

Sehubungan itu, kata beliau, rakyat khususnya di Sabah tidak perlu bimbang kerana keadaan keselamatan di negeri berkenaan terkawal dengan pihak berkuasa mengadakan kawalan dan pemantauan di darat dan laut.

"Operasi dijalankan pihak keselamatan di kawasan ini mengikut keadaan atau situasi semasa dan kita akan lakukan apa sahaja tindakan bagi memastikan penceroboh ini ditumpaskan," tegasnya.

Beliau menambah, Angkatan Tentera Malaysia (ATM) telah menghantar bantuan tambahan dua batalion tentera darat untuk menyertai operasi menamatkan pencerobohan kumpulan bersenjata tersebut.

"Beri masa (pasukan keselamatan) untuk lakukan apa juga tindakan operasi dan saya yakin serta percaya dengan kemampuan mereka," katanya.

Menjawab satu soalan, Najib berkata, kes pencerobohan di Sabah tidak akan menjejaskan proses Pilihan Raya Umum Ke-13 kerana yakin kejadian itu akan dapat diatasi pihak berkuasa.

Hakcipta Terpelihara © UTUSAN MELAYU (M) BERHAD

Source: http://www.utusan.com.my/utusan/Dalam_Negeri/20130304/dn_01/Najib-arah-siasatan-terperinci